

## Enyaarubha ya kabhiri ya Yohana Obhutaangiro

Yohana akakaama enyaarubha yino kumukari omusorwa hamwe na abhaana bhaaye. Kwa amang'ana gayo yaari arakeerenerya ekanisa. Kyaamwe akabhuga enyaarubha yiyo yaari kwiiguru ya abhiikirirya bhoosi. Munyaarubha yaaye ya kabhiri, Yohana arageenderera okubhatoongera egoro abhiikirirya okubha bhiikare kwo okumenyeekererya obhuheene no obhuseegi. Kweeki arageenderera okubharekya iguru ya abheegya bho orurimi. Arakumiirirya abhiikirirya bhabhe meeso na bhagumire mubhwiikirirya bhwe eheene.

### *Obhukeerya*

<sup>1</sup> Enye omukaruka we ekanisa, nirakukaamira awe omusubhaati wuno osorirwe na Taatabhugya, hamwe na abhaana bhaazo\* bhano nikubhaseega kwe eheene. Etari enye omweene, nawe na abhaandi bhoosi bhano bhamenyiri obhuheene.

<sup>2</sup> Nirabhaseega kwo okubha etwe na neemwe tumenyiri obhuheene, kweeki turageenderera okubhumenya kirakeego.

---

\* **1:1 Omusubhaati wuno osorirwe na Taatabhugya, hamwe na abhaana bhaazo**, obhugazuro bhwaku ni kanisa endebhe hamwe na abhiikirirya bhaaye.

<sup>3</sup> Orubhaango, ebhigoongi no omureembe okurwa ku Taata Taatabhugya no Omwaana waaye Yeesu Krisito, bhibhe etwe twoosi bhano tukutuniirira obhuheene no obhuseegi.

*Okuseegana nikwo okwiigwa emigiro gya Taatabhugya*

<sup>4</sup> Nikazomererwa bhukong’u kurora abhaana bhaazo abhamwe bharatuniirira enzira yo obhuheene, kyeego Taata Taatabhugya akatuswaagya.

<sup>5</sup> Bhoono, omusubhaati omuseegwa, munyaarubha yino, nirakusabha kubha wiigwe obhuswaagyo bhuno bhukubhuga tuseegane. Emigiro giyo gitari mihya, nawe ni giryagirya gino twaari nagyo kweema hano mwaataangiri okwiikirirya.†

<sup>6</sup> Okuseegana nikwo okwiigwa obhuswaagyo bhwa Taatabhugya. Obhuswaagyo bhuno mukiigwa okurwa obhweemero nikwo okwiikara kwo obhuseegi.

*Obhurekya iguru ya abhang’eenererya*

<sup>7</sup> Niragaamba ego kwo okubha abhang’eenererya bhaaru bharweereeri mukyaaro. Bharabhuga kubha Yeesu Krisito akaaza mukyaaro akabha atana omubhiri gwo omuutu.‡ Omuutu wowoosi wuno akubhuga ego ni mung’eenererya, kweeki ni mwaangi wa Krisito.§

---

† 1:5 Rora Yohana 13:34. ‡ 1:7 Rora 1 Yohana 4:2-3. § 1:7 *Mwaangi wa Krisito*, bhugazuro bhwaku ni wuno akwaanga emirimo gya Krisito.

<sup>8</sup> Ambe, mwiirihe abheene, okubha emirimo gyeetu\* gitaaza kubhura bhusa, nawe musuung'aane okurwa ku Taatabhugya amariho amazomu.

<sup>9</sup> Wowoosi wuno atakugeenderera kugwaata ameegyo ga Krisito, kweeki aragakyooosya, wuyo atana obhumwe na Taatabhugya. Nawe, wuno akugeenderera okugwaata ameegyo ga Krisito, wuyo ano obhumwe na Taata Taatabhugya no Omwaana waaye woosi.

<sup>10</sup> Eraabhe wowoosi araaza kweemwe wuno atakweegya ameegyo gayo, mutamuginihya muziinyumba zyeenyu, naabhe mutamukeerya kyo Omukrisito omurikyeenyu.

<sup>11</sup> Omuutu wowoosi wuno akumukeerya ego, ari hamwe neewe mubhibhi bhino akukora.

### *Amang'ana go okuraga*

<sup>12</sup> Nina amang'ana maaru go okukaama, nawe nitakweenda kukaama gayo kunyaarubha. Ndiisiga kuuza kweemwe okubhataarira no okukeerenia hamwe neemwe obhusyo kwo obhusyo, okubha obhuzomererwa bhweetu bhukuunaane.

<sup>13</sup> Abhaana bha musubhaati waazo wuno asorirwe na Taatabhugya,† bharakukeerya.

---

\* **1:8 Emirimo gyeetu**, amakaamo agaandi ge Ekiyunaani garabhuga, *emirimo gyeenyu*. † **1:13 Abhaana bha musubhaati waazo wuno asorirwe na Taatabhugya**, obhugazuro bhwaku ni bhiikirirya bhe ekanisa endebhe.

**Eriiragano Eriihya**  
**The New Testament in the Zanaki language of**  
**Tanzania: Eriiragano Eriihya**

copyright © Wycliffe Bible Translators, Inc.

Language: (Zanaki)

Contributor: Wycliffe USA

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-13

---

PDF generated using Haiola and XeLaTeX on 11 Mar 2026 from source files dated 13 May 2025

59cdaa0a-a2d1-5bd9-b56f-be1ffc1ff2aa